

Pitögören Kimbi 2

Pitönön Kimbiñi aliga 2 ahök.

Jim-asa-asari

Pitönön Kimbi ki Kraistkö alaurup gölme dop tat angeri, yengöra ali anda liliköyök. Tosatñan keu sohoboho miwikñaiba ambazip kusum sohom engigerangöra malmal sarakñi mosöta sero namböñnamböñ yuai lañ aka malget. Böhi takapulakanñi mi Anutugö keu bapñe qahö anda (2.10) iwilele (3.17) aka sileñini möpöseiba (2.18) jakbaköranböran (2.10) aka nanñini imbi-imbi malget. Aiakanñinan Jisös qañ köl wangiget. Yenön ilit ambazip gödaqeqeñini qahö mala anjanbanjan ambazip (2.3) lölöwöröñi (2.18)janjun mem engiget. (3.3-4)

Pitönön keu aka ahakmeme miangöra waimanjat ketanñi möta dingimapköra bim qeba amötqeqegö könanñi jim tuariza. Uruñini kuñguba jimkutukutuñi kewö ohoyök, “Anutu aka Kembu Jisös Kraist ölña möt narim etkiba yetpuk qekötahöinga lömböt mi mem et ali amqema. Mötmöt mewöñi mi jimburenñ qahöpmö, ambazip nanñini jeñinan Jisös eka ambazip kusum engiba malöhi, mi möta jiget kaiga mörin. Miangöra mönö malmal sarakñi mala kopa malmal aka uruyahöt mi andö qeme.”

Tosatñan kapan köla kewö lañ jiba ambazip kusum sohom engiba malget, “Kraistnön kunbuk qahö lilingöma.” Keu mi jimburenñ keuya. Pitönön keu miangöra waimanjat ketanñi möta likepñi kewö melenña jiba ohoyök, “Kraistnön nalöñi

könjörari öngöiga lilingömawanjö tandök akzawi, mi kewögöra: Anutunöj ambazip neñgöreñök kunjan ayuhumapkö qahö mötzapmö, körek neñön urunini melenja singisöndok malmalnini mosötpingö möta kapañ kölakza.”

Buk kiangö bahöñi bohonñi 4 mi kewö:

Keu mutukñi 1.1-2

Anutunöj sarakñi malbingöra neñgoholök 1.3-21

Böhi takapulakanñi yeñgö könañini 2.1-22

Teteköñe Kraistnöj lilingöba kama 3.1-18

¹ Saimon Pitö nöñön embuk keu eraum mötpingöra kimbi ki ohozal.

Jisös Kraistnöj melaim niñgiiga aposol aka welenñi qeba malakzal. Bem Anutuninan Amötqeqe Toñi Jisös Kraist melaiiga eri yañgöra aka keunini jim teköi solaniinga mötnaripninan ahuyök. Injini mötnarip miyök buña qem angugetka bohonñi öngöñgöñi aiga nini ewö simbawoñ malje.

² Injini Anutu aka Kembunini Jisös möt kutum etkizei, yetkön mönö kalem möriamñi kelenmaleleñ enñiyohotka luainöñ malme. Mewö.

Anutunöj enñgoholöhi, miyañgöreñ köhöiba kinme.

³ Anutunöj asakmararañ Toñi aködamunñambuk akza. Mianjö dop nini sarakñi aka malbingöra neñgoholök. Mewö könañi möt yaköinga kalem neñgimazawañgö könañi asuhuyök. Nini malmal köhöikñi mala urugö köl guliguli pitirik akingöra yuai osimakini, yañgö bem ösumñan mönö mi pakpak neñgiiga buñanina ahakña.

⁴ Asakmararañ Toñi yañön urunine nupñi nupñi wewelip-ñambuk memba kalemñi pakpak

nenjimamgö mörakza. Anutunöŋ jöhöjöhö keuŋi nenjiyöhi, miangö söngöröŋan mönö öngöŋgöŋi akza. Inini mutuk gölmegö sihim kömbönaŋini bölöŋi laŋ wuatangöba aŋgöjörak uruŋe malgetmö, Anutunöŋ inini miangö-reŋök meköba bohonŋini jöhöyök. Mewö aiga kopa malmal sööreiba andö qemegöra amötqeŋe areŋi ali ahöza. Mötmöt ahakmeme aködamunŋambuk Anutugöreŋ ahözawi, yaŋön inini miangö dop letota kölöŋaimegöra kapaŋ kölakza. Inini jöhöjöhö keuŋi keta bölökŋi miangöreŋ qekötahöze ewö, yaŋön mönö inahöm enŋiiga kunbuk letota Suepkö aködamunŋi miwikŋaiba buŋa qem aŋguba malme. Aködamunŋi mianön ölop töŋjonjonŋöba dop köl enŋima.

⁵ Anutugöreŋ jöhöjöhö keu mewö ahözawaŋgöra aka inini mönö mötnaripkö ölni ahum enŋiiga kondela malme. Mewö malmegöra mönö kapaŋ köla zeŋ kinda bim qeba malme. Ölni ahum enŋimawi, mewö ölop Anutugö könaŋi toroqeba möt kutume.

⁶ Mötkutukutuŋinan qariiga ölop ahakmemeŋini toroqeba galöm köl aŋgumakŋe. Galöm köl aŋguaŋgunŋinan qariiga ölop kin köhöiba lömböt mököstönda bisiba malme. Kin köhököhöiŋinan qariiga ölop kunbuk Anutugö jitŋaŋgö dop urugö köl guliguli aka malme.

⁷ Urugö köl guliguliŋinan ahum qariiga ölop urukalemŋinan sehiiga urumeleŋ alaurup ala-ala aka köyan köl aŋguba malme. Urukalemŋinan sehiiga ölop ambazip pakpak jöpaköm enŋiba malme.

⁸ Inini Anutugö aködamun mewöŋi buŋa qem aŋguba mem sehiba malme ewö, mönö gilip-itŋi (ambetakŋi) kude malme. Mewö qahöpmö,

aködamunñi mianñon mönö nam köl enñiiga amqeba Kembunini Jisös Kraistkö könañi möt kutuba ölop nupñi jegep kinda megetka ölni ahumakña.

⁹ Ölop ahumakñapmö, denike yeñgöreñ Anutugö aködamun mewöñi qahö ahöm engiza ewö, yeñgö mötkutukutuñinan mönö töröpñi aiga bau jegömöl ewö kiñkuñ kañkuñ akze. Anutunöñ siñgisöndokñini walñi sañgoñni sarakñi akeri, mi ölum enñui ikmaok malje.

¹⁰ O urumelen alaurupni, Anutunöñ möwölöhöm engiba engoholöhi, iñini miangöreñ tim töndangöba kinme ewö, mönö nalö kunöñ qahö tala kaman kölme. Miangöra enñon mönö miangöreñ köhöikñanök töndangöba kinbingö kapañ köla malme.

¹¹ Mewö aka malgetka Anutunöñ engehi dop köli köl öröm enñiiga Suep miri nanñuñan lökñanök taliga ölopñanök uruñe öngöme. Kembunini Jisös Kraistnöñ Amötqeçe aka bemtohoñ Toñi akza. Yangö bemtohoñ uruñe öngögetka nalö teteköñi qahö galöm köl enñiiga oyaenkyoaen aka malme.

¹² Buña keu ölnan köna mewö kondel engizawi, iñini mi lök buña qem anñuba miangöreñ böñ qeba kin köhöize. Miangöra keu areñ jizali, mi ölop möt asarizemö, nöñon töndup miangöra nalö dop jim gulim enñimamgö mötzal.

¹³ Mewö möta sile kiangö sepö koumnöñ mal-mamañgö dop keu areñ mi ölum enñubapuköra mötmötñini jim guliba kuñgum enñimamgö mötpi dop kölja.

¹⁴ Nöñon sileni kusukñi ki sepö koumni ewö luluñda zilañ kömumba uñem mire öngömami, mewö

möt yaközal. Kembunini Jisös Kraistnöŋ mewöyök buzup keu mewöŋanök jii möral.

15 Keu areŋ kusum engiali, mianŋön urukönömŋine ahöiga nöŋön nöŋ qeba kömup mire anbiga mianŋö andöŋe mewöyök mi ölop nalö dop mötmöriba malme. Nöŋön mianŋöra köhöiba kapan kölakzal. Mewö.

Kraistkö asakmararaŋi mi jeninan eka naŋgöba jizin.

16 Kembunini Jisös Kraistnöŋ qetbuŋaŋi öŋgöŋgöŋi memba nup kukösumŋambuk memba malöhi, neŋön mi nanine jeninan uba eka malin. Mewö mala mianŋö dop kukösumŋaŋö könäŋi aka liliŋgöba kamawaŋgö keuŋi mi jim asarim engiba malin. Mi bem samban kösohot* ewö qahö jimbureŋ ahin. Girabu mötmöt ewö mi laŋ qahö wuatangöba malin.

17 *Nöŋön Jisösgö qetbuŋaŋi öŋgöŋgöŋi mi naninak kewö asuhuiga ehin: Asakmararaŋ Toŋi öŋgöŋgöŋi yaŋön keu jiiga qet kewö asuhuiga mörök: “Azi ki nani wölböt nahöni aiga yaŋgöra urunan ölöwahiga eknahöm ak waŋgizal.” Yaŋön mi möriga Iwi Anutunöŋ asakmararaŋ waŋgiiga aködamunŋi buŋa qem anguba malök.

18 Neŋön yambuk kundunŋi töröŋi mianŋöreŋ öŋgöba malinga qet mianŋön Suepnöhök asuhuiga mörin.

* **1:16:** Bem samban miengö könäŋini kun mi kewö: Mötmöt ambazip yenŋö uruŋine jimbureŋ mötmöt letoriga keu könäŋi könäŋi laŋ mötmöriba numbu o algetka asuhumakze. * **1:17:** Mat 17.1-5; Mak 9.2-7; Luk 9.28-35

19 Kezapqetok ambazip mutuhök Buña keu jiba ohogeri, mi nalö kewöñe möt sölöngöba anğön kölinga pöwöwöm köhöikñi ak neñgiza. Mianğöra Buña Kimbi walñanğö keuñi mi mönö törörök kezap ala buña qem anğuba malme. Kiwanöñ miri söñsöñaune asarimakzawi, kezapqetok keu mienön mönö mianğö dop jim asarim enğimakze. Inini mianğö asakñe qekötahöba kinme ewö, mönö ölöp Anutugö köna ölni eka söñaupkö ahakmemeni yaköriba mosöta malme. Mewö mal öngöba mambötketka miri wanğaran suruiga söñangö undiñi asuhuiga uruñinan asarima. Kembuninan lilingöba kamawanğö undiñan mönö mem asarim enğii eka Anutugö yuai pakpak ek asarim teköme.

20 Keu nöropñi mutukñi ki mönö möt asarigetka kude ölum enğuma: Gölme ambazip kunñan Buña Kimbigö kezapqetok keuñi mi nanñi mötmöt qakñe jim asarimangö osimakña.

21 Mi kewögöra osimakña: Gölme ambazip kungö jit sihitñan nalö kunöñ qahö nam köliga kezapqetok keu asuhui jiget. Mewö qahöpmö, Uña Töröñan kezapqetok ambazip uruñine sölölohöm enğiiiga Anutugö jitneyök keu memba mönö mia jiget. Mewö.

2

Böhi takapulakanan mönö mala ayuhume.

1 Kezapqetok ambazip takapulakanani mi mewöyök Israel könagesö sutñine asuhuget. Mianğö dop enğö sutñine böhi sohoboho mewöyök asuhume. Asuhuba kinda mötnaripñini ayuhumapkö enjololon keu kembangan kembangan mi

tölapköba memba sutñine kame. Ketañamninan sohopñini meyöhi, Kembu mi mewöyök qañ köl wañgiba mewö mianñon nanñini köndenñ anğuba wölañ ayuhume.

² Mewömö, mi töndup ambazip sehisehiñan mönö yeñgöreñ serowilin silikñini wuatangöba nanñini imbi-imbi malme. Mewö malmeanğora ambazip mötmötñini qötömötötañ aketka urumelenğö köna ölñan mötmötñine gamuñambuk ahakña.

³ Böhi takapulakañi mienñon mönö yuai membagun membingö köpösöngöba nepaqepalok aka kösohot könañi könañi jimburenñ (zöm mindiriwa) aka lañ jim sehiba malme. Mewö malgetka eñon mi möta anqeba monenñ yuai tokogetka lañ örömgöjup memgöjup aka malme. Anutunönñ ambazip mewöñi yeñgö keuñini lök möpñangö möpñe jim teköiga likepñi melenñiga qakñine öngömapkö ahöza. Anutunönñ köndenñmöndenñ enğimamğö tañqañ ikmaok qahö akñapmö, öl töhöñña sihimbölö möta malme.

⁴ Köndenñmöndenñ asuhumapkö galöm meme keu tosatñi kewö: Suep garata tosatñan Anutugö jitñi qetala singisöndok akeri, Anutunönñ i qahö enğehoriyökmö, aköm enğiiga könöp mire emuyanğoreñ geget. Yaköriba panaman miri dutñe ala ain tapepnönñ (muñgamuñga) gwaröhöm enğiyök. Gwaröhöba galöm köl enğiiga keuñinangö kitipñi jim tekömapkö mamböt tatkerata tata kotze.

⁵ *Möpñangö möpñe ambazip anğöjörakñinambuk gölmenönñ malgeri, Anutunönñ i

* 2:5: Jen 6.1-7.24

mewöyök qahö engehoriyökmö, göulu ketanji jiiga wahöta enquba turum enqiyök. Turum enqiyökmö, tøndup azi Noa mianjön urumelenqö keu jiba ahakmeme diñdñi akñegö uru kungum enqiba malöhi, i aka ambazip 7 mia malmalñini anqön köla sel jöhöm enqiyök.

⁶ *Mewöyök Sodom Gomora taon yahöt mi ayuhumahotkö keuñini jim teköba könöpnöñ enqohoiga gapñiranök ahöyohot. Ambazip anqöjörakñinambuk yenqöra yuai denöwö asuhumawi, mianqö söpsöpñi ekingöra mi al enqii akzahot.

⁷ *Könöpnöñ körek enqohomamqö ahökmö, tøndup azi solanñi Lot mi mutuk sutñineyök meköba anqön köl wañqiyök. Iwilele ambazip sero namböñnamböñ aka nanñini imbi-imbi ahakmeme tosatñi lañ aket eka yenqöra möt böliba uruñan eri malök.

⁸ Azi solanñi mianjön yenqö sutñine mala ahakmeme iwilele kanjamñambuk eka möta malöhi, mianqöra mönö wehön dop möt jinjingöba malök. Uruñi sarakñan mönö sundan böliiga malök.

⁹ Galöm meme keu jizali, mienjön Anutugö könañi kewö kondelakze: Kembunöñ ambazip Anutugö malmal köhöikñi köl gulimakzini, nini ölop esapesapnöhök meköba bohonini jöhömamqö mörakza. Mi mörakzapmö, ambazip gonqonji mi keuñinanqö likepñi melenñi qakñine öngöiga garataauruñan galöm köl enqigetka malme. Mewö mala öngögetka nalö ketanjan kaiga keuñini jim teköiga toroqeba sihimbölö möta malme.

* 2:6: Jen 19.24 * 2:7: Jen 19.1-16

10 Ambazip silenjanğö sihim kömbönanji bölöni wuatangöba anğöjörakñinambuk aka iwilelenöñ Anutugö kukösumñi memba et alakzei, Anutunöñ mi mönö mutuhök jim teköm enğiyöhawa sihimbölö ketanji möta malme. Böhi takapulakanji mienön mönö jakbak-orañborañ qakñe nanñini imbi-imbi mala Suepkö bem suahö asakmararanñinambuk euyangören maljei, yeğöra sömbu-ñini qahö mörakze. Mi qahöp mahöpmö, i mewöyök uruqeçe keu töhöreñ jim enğimakze.

11 Mewö ahakzemö, Suep garata kukösumñinambuk böhi sohoboho mi enğonğita öngöngöñi akzei, mi töndup Suepkö bem suahö ambazip mi Kembugö je mesoholñe qetala uruqeçe keunöñ töhöreñ qahö jim teköm enğimakze.

12 Garata yeñön mewö qahö ahakzemö, ambazip mienön silenini memba öngöba Buña keu qahö möt kutuba mi töndup yeğöra uruqeçe keu töhöreñ lañ jimakze. Sömbup soñ ewö mötkutukutuñini ölni qahö asuhuiga sömbup malmalgö sihim yuai korembiñi miyök mörakze. Sömbup soñ mi asuhugera ambazipnöñ lañ enğugət kömumakzei, yeñön mönö mianğö dop lañlañ tönpin mala ayuhume. Nanñini sihim mötmötñini goñgoñmañgoñan mönö köndeñ enğigetka ayuhum teköme.

13 Tosatñi öröm ureim ak enğigetka kahasilililñ mötketmö, Anutunöñ nanñini keuñinanğö likepñi meleş enğiiga sihimbölö miyök qakñine öngöma. Urumeleñ enön urukalem kondel anğubingöra tokoba lömbuañ algetka takapulaka böhi mienön mönö mianğöreñ mewöyök kamakze. Kaba

dogonjini aukne kondela bau numbu nemakze. Mewö aka engö sile töwötjini boromni boromni gamunambuk ewö akze. Nanjinak silenjanngö sihimni meköbingöra totoko yuai asakne ala sero aukne aka lanlan söngaimakze. “Ziozgö lama galöm akzin,” jiba ala engöra qahö mötmöriba tilipköm engibingö sösongai mörakze.*

14 Jenini kaisero jeje aka ambi engehakzei, mi serowilinök akingöra mörakze. Sero singisöndok yuai akingö sihimni mi qahöpmahöp mosötpingö mörakze. Ambazip kongwarak kölakzei, mi öröm engigetka köna jitne gegetka örömböknöj jölnjini mesinmakza. Membagun memingö nepaqepalok köpösöngögetka urumötmötjini köhöikni miangörej ahöza. Mewö ahakzeangöra Anutunöj saitköm engiiga ayuhume.

15 *Yenön köna diñdini andö qeba kahalalom janjun anda kezapqetok azi Balam Beorgö nahönni yangö urukönöp köna wuatangömakze. Kerök azi kembu kunöj Balam Israel ambazip tilipqilip ak engimapköra töwa wanjiyöhi, urusihimnan mönö monej miangöra ak wanjiyök.

16 Ak wanjiyökmö, donki kunöj bölöjamngöra jim bölim wanjiyök. Donki sömbup keu qahö jijiñi miangön mönö azi jölnöj keu jiba kezapqetok azi miangö urusohop ahakmeme mi jöhöm wanjiiga osiyök.

17 Ambazip mienön mönö o jeni jöpjöpköñi ewö tandök malje. Raidimbom luhutnöj kousu omani töhöntöhön muwutapköm engimakzawi,

* **2:13:** Böhi mienön törom ewö asamböta tatzemö, wanjeninan yengörej qaköba jömgöbapak. * **2:15:** Jan 22.4-35

mönö miangö dop öne lanlan anda kamakze. Anutunöŋ pandaman göjiwinangö uruŋe yeŋgöra miri arengöm engiyöhi, mönö emuyangöreŋ dutŋe geba malme.

¹⁸ Yeŋön kezapjupjup keu omaŋi jiba silenini memba öngöba lan tiwok-mawok aka terengömakze. Silegö sihim kömbönaŋini bölöŋi wuatangöba sero namböŋnamböŋnöŋ ambazip lan öröm engimakze. Janjuŋ maljei, tosatŋan yeŋgö sutŋineyök ölöŋ kölakzei, mönö mi kelök keunöŋ kuŋgum engigetka köna jitŋe gegetka örömböknöŋ jölŋini mesinmakza.

¹⁹ Yuai kunöŋ ambazip kun jöhöba galöm köl waŋgimakzawi, miangö kösöŋan mönö i jöhöiga mi töwa qahö öne welen qeba malja. Miangö dop böhi takapulakaŋi mienöŋ kelök keu kewö lan jimakze, “Inini mönö nini toroqem neŋgigetka ölöp kösöŋini qahö solanŋi aka nanŋini imbi-imbinoŋ malme.” Keu mewö jimakzemö, mi töndup nanŋinak aŋgöjörakŋinangö welenqeqeŋi aka miangö kösönöŋ malje.

²⁰ Yeŋgö könaŋamŋinan kewö gonŋiiga malje: Kembunini Jisös Kraist Amötqeqe Tonini i möt kutuba mewö miangöŋ gölmegö ahakmeme aŋgöjörakŋambuk misiŋgöba andö qebagun mönö kunbuk miangö kösönöŋ köpeim aŋguba qaköba tatze. Miangöra könakönahiŋe ölopölöp malgetmö, teteköŋe böliqölim teköba malje.

²¹ Anutunöŋ keunini jim teköi solanibingö könaŋi mutuk qahö möt kutuba tönpin malbeak, miangöŋ mönö eretŋi ak engibawak. Mewö akawakmö, Buŋa mi ölna jigetka möta könaŋi möt kutugetka buŋaŋina ahök. Uruŋini melenŋa

miangö andöŋe jöjöpaŋ keu töröŋi andö qegeri, mianjôn mönô yuai kanjamŋambuk aka gamu qem enjimakza.

²² *Andö qeba köpeim anğuba etkeri, mi uruqe-siŋ keu ölbölŋi yahöt mietkö dop akza. Keu jitŋi kun kewö, “Kiamnöŋ loŋnöhänğöreŋ lilingöba kamakza.” Keu jitŋi kun kewö, “Bau sanğonŋinga dumge eleŋda sömuk piliŋpiliŋnöŋ luhuba geba lömu aumakza.” Mewö.

3

Kembu kamawangö jöhöjöhö keuŋi

¹ O wölböt alaurupni, nöŋön kimbi yahötŋi ki albi enğoreŋ kaza. Keu jizali, iŋini mi lök mötzemö, nöŋön keugö öŋŋi ahumapköra uruŋini sarakŋi kunğuba jim gulim enğiba kimbi yahöt ki kewögöra ohozal:

² Kezapqetok ambazip sarakŋi yeŋön mönöwök Buŋa keu jiba malgeri, mianğöra mönô ölum enğubapuk. Mewöyök Kembu Amötqeqe Toŋan jimkutukutu neŋgiiga nanŋini melaimelai azi aposolurupŋinan kusum enğigeri, mönô mi mötmöriba köl guliba malme. Mianğöra nöŋön keu miyöhök ohobiga yahöt akŋa.

³ *Keu mutukŋi kun kewö möt asarime: Kraistnöŋ lilingömangö aiga nalö teteköŋe mianğoreŋ mepaqepaik ambazip asuhuba ahakmemenjanan nanŋini sihim kömbönaŋini bölöŋi wuatangöba ilit keu jiba malme.

⁴ Tosatŋan lilingöba kamawangö keuŋi kewö jiba qeapköba malme: “Kamawangö jöhöjöhö keuŋi mi

* 2:22: Qam 26.11 * 3:3: Jud 18

mönö denikeangören ahöza? Ambösakoninan mala kota kömugeri, nalö mianğörenök yuai kunğan kun qahö meleni geyök. Anutunöñ Suep gölme miwikñaim etkiiga öroyuai pakpak könahiba ahöyöhi, mi mönö mewöñanök ahöba kori maljin.”

⁵ *Mewö jiba keu kötñi ki ölan qemakze: Anutunöñ möpñangö möpñeyök jim kutuba keuñangö ösumñan suep jakeni jakeni miwikñaim engiyök. Mewöyök o jim kutum engiiga denđa angetka mi-anön gölme miwikñaiiga onöhök asuhum tinğirök. Yeñön keu kötñi mi mötzemö, mi qahö mötzin tandök möndöba lañ jiba nönöñgan ahakze.

⁶ *Könangep jim kutuiga o gölunöñ wahöta gölme turuiga ambazip nalö mianğören gölmenöñ malgeri, mi o nemba kömumjaiget.

⁷ Yeñön onöñ kömumjaigetmö, suep gölme nalö kewöñe etkehakzini, mi könöpnöñ ayuhumawanğö dop akza. Anutunöñ mianğö keuñi lök böñtöñ jim kutuiga ahöza. Mianğö ölni asuhumawanğö nalöñan kam kuñguiga Anutunöñ ambazip anğöjörakñinambuk maljei, yeñgö keuñini jim teköba könden yeñgiiga ayuhume.

⁸ *Mewö asuhumapmö, wölböt alaurupni, nani-nak ehinga yambu 1000 mi nalö köröpñi akzapmö, Buña keu mohot ki mönö kude ölum enguma, “Wehön mohot mi Kembugö je mesoholñe yambu 1000:gö dop akza aiga yambu 1000 ehiga wehön mohotkö dop akza.”

⁹ Kembugö jöhöjöhö keu mianön öñambuk akñapmö, mianğö nalöñi mi törörök qahö mötzin. Tosatñan nalö mi könjörari öngömapköra mötmöriba

* **3:5:** Jen 1.6-9 * **3:6:** Jen 7.11 * **3:8:** Sum 90.4

lan jimakze. Nanjak nalöni qahö könjörari öngömappmö, mökösönda ambazip körekjan urunini melenbingöra mambörakza. Kunjan könöp sianön gebapuköra kapan kölakza.

¹⁰ *Keujanö ölni asuhumappmö, Kembangö kaka nalönan mönö yongorö meme azigö tandök kam kunguma. Mi ouk-tuknine tiiga osibin. Nalö miangören suep gölmegö yuai ehekni pakpak mi mönö könöwiba jeba gapnanök ahöma. Wehön köin sengetau aka suepkö yuaini pakpak mi julkula ötön bölöbölönambuk ayapköba qahöwakne. Gölmegö aka ambazipnön yuai pakpak miangören memba alget ahözawi, Anutunön mi körek köndenmönden meleni gema. Geba jem teköiga yuai kun qahöpmahöp ahöma. Saumban!

¹¹ Öroyuai pakpak mi tandök mewö julkula qahöwakneangöra enön mönö ambazip denöwöni aka malgetka dop kölbowak? Miangöra mönö ahakmeme sarakni wuatangöba Kraist ewö aka malbingö köl guliba malme.

¹² Inini Anutugö nalö ketani mi kam kungumapköra mamböta zilan kamapkö nupni kapan köla memba malje. Nalö miangören gölmegö öroyuaini aka wehön köin sengetau aka mewöni mi könöwiba jeba bolbolgöma. Anutunön suepkö öroyuaini mi körek köndenmönden aliga julkula jem teköma.

¹³ *Mewö jem tekömappmö, Anutunön yuai asuhumapkö keu jöhöi ahözawi, neñön miangö dop Suep gölmegö dölökni miwiknaim etkimapkö

* **3:10:** Mat 24.43; Luk 12.39; 1 Tes 5.2; Ind 16.15 * **3:13:** Ais 65.17; 66.22; Ind 21.1

mambörakzin. Mi miwikñaim etkiiga miangören aᅅgota ahakmeme diᅅdiᅅi wuatangöba malbin.

¹⁴ O wölböt alaurupni, eᅅön nalö ketañi mi kam kuᅅgumapkö mamböta malje. Miangöra mönö kewö akingö kapan köla kinme: Uruᅅini sarakñi aiga Anutunöᅅ töwöt boromñinaᅅgö keuᅅi kun qahö miwikñaiiga yambuk ösupközeangöra luainöᅅ malme.

¹⁵ Mamböta Kembuninaᅅgö uru tandökñangöra kewö mötmöriba malme: Yaᅅön iᅅini uruᅅini melenᅅa kunbuk letotmegö nalöᅅi mem körim al eᅅgiba ösöᅅ mamböt eᅅgiba malja. Wölböt alanini Pol yaᅅön mewöyök keu miyök ohom eᅅgiyökmö, Anutunöᅅ mötkutukutu öᅅgöᅅgöᅅi waᅅgiiga miangö dop keuᅅi ohom eᅅgiyök.

¹⁶ Miangö keuᅅi mi kimbiᅅi pakpak miangören jiba ohomakzapmö, Buᅅa Kimbiᅅangö uruᅅe keuᅅi tosatᅅi mi lömbötᅅambuk. Miangöra tosatᅅan mi möt asaribingö jaram tiba lömbörimakze. Gukmaulem ambazip kuᅅgwarak qeba tötöpinpin laᅅ malakzei, yeᅅön kimbiᅅi kimbiᅅi mi laᅅ möwöramgömakze. Miangö dop Polgö keuᅅi mewöyök melenᅅelenᅅ aketka supapköba sohomakza. Mewö möwöramgöba kinda nanᅅini mem bölim aᅅguba könöᅅ sianöᅅ geme.

¹⁷ Yeᅅön gememö, wölböt alaurupni, eᅅön mewö asuhumapkö keuᅅi lök qelᅅiᅅe möta malje. Miangöra mönö nanᅅini galöm mem aᅅguba malme. Iwilele ambazip köna siᅅgiba qiwitipkömakzei, eᅅön mönö yeᅅgö kelök keuᅅinan örom eᅅgii eᅅguatangöba jinᅅauᅅ anbeᅅuk. Malmalgö tandö pöwöwöm köhöikᅅi miangörenök mewö tala kaman kölbepuk.

18 Kembunini Jisösgö kalem möriamne kinjei, mianğöreñ mönö kunbuk suariba köhöiba malme. Amötqeçe Tonini Kraistkö könañi möt kutuzei, mi mönö toroqeba möt yaköm soroköba malme. I möpöseininga qetñi nalö kewöñe aködamun-ñambuk aka könañgep teteköñi qahö mewö ahöm öngöma. Keu mi ölña.

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Apr 2025 from source files dated 31 Aug 2023

c0871260-68cc-5a50-953f-52200e105d1e